

ГЕННАДИЙ  
ЮШКОВ



Бур..  
иоз  
водзын



Бөрзя

кадся

кывбурзяс



Юшков Г. А.

**Бур..  
иоз  
водзын**

Сыктывкар  
Коми книжной  
издательство  
1984

83.3К0  
Ю 96

**Юшков Г. А.**

**Ю 96** Бур йӧз водзын: Кывбуръяс.— Сык-  
тивкар: Коми кн. изд-во. 1984. 80 л. б.

Геннадий Анатольевич Юшков — тӧдчана коми гижысь. Бӧръя кадӧ сійӧ зӱля уджаліс проза юкӧнын. Тайӧ книгаас сійӧ бур йӧз водзӧ петкӧдчӧ ас-лас виль кывбуръясӧн, кӧні эм и нюм, и серам, и олӧм вылас стрӧг видзӧдлас. Стӧчджыка кӧ — кывбуръяс пырыс аддзан талунъя олӧмыслысь и гугсӧ, и бансӧ.

83.3К0

Ю  $\frac{0743 - 012}{M 128(03) - 84}$  25 — 84 м

© Коми книжнӧй издательство, 1984.





\* \* \*

Октябрлөн яр биыс оз чусмы ни кус,—  
Ми партия вежөрөн ёнёсь.  
Мед олас да вылас Сöветскöй Союз,  
Көн морт вöсна сувтö Законьс!

Збыль öтласа шудьс эз вылісянь усь,—  
Ми сьöкьдöс вояссö вуджим.  
Мед олас да вылас Сöветскöй Союз,  
Көн медьдждь доньс бур уджлы!

А туй визьным миян оз оравлы — кузь,—  
И мойдысь на вайödö ылö.  
Мед олас да вылас Сöветскöй Союз,  
Көн сё кывйөн олöмыс сьылö!

### *Ёртасьöм*

Ми тöдам ёртасьöмлы дон,  
Ми сійöс сьöлöмъясөн öзтiм,  
И миян олöм — зумьд, ён —  
Век лоö вуджöртöм да сöстöм.

Сё кывъя войтыр, пестам ми  
Зиль уджөн ёртасьöмсö тайöс.  
И миян кöсйöм — Шуд да Мир —  
Став Мулы долыдлунсö вайö.

## *Ленин йылысь*

Эз эськӧ озыр котыр сійӧс сукляв-саав,  
Виж лӧгӧн пу да ӧнӧдз на век увт,  
Эз ковмы дзебсясьны, эз вӧйлы йиа ваӧ,—  
Эз тайӧ туй вылас кӧ сувт.

Но ыръян сьӧлӧмыс эз лэпты сэтшӧм олӧм,  
Кӧн уджсӧ мыркысь помся пыкӧ шог.  
И вылӧ пунктис сӧмын лов-вир сетысь колӧм,—  
Важ мирсӧ мӧдар путкыль вӧчан мог.

И биа туйӧ ёся чукӧстӧмсӧ сылысь  
Эз кывтӧг овны, кодлысь пычкылісны сӧз.  
А ӧні тайӧ зумыд, веськыд Мир туй вылас  
Пыр унджык петӧ Му пасьтасьыс йӧз.

\* \* \*

Эз на важӧн: парма-вӧрӧд татӧн  
Ветлӧдлісны быдӧн аслас пасӧн.  
Содис ӧдыс мортлӧн миян кадӧ,  
Қытшовтӧны Му гӧгӧрыд часӧн.

Вежмасьӧмӧн оз босьт ӧні олӧм:  
Му шар вылас он кут тадзтӧ тӧрны.

Кызкө эськө морт ногөн жө колө  
Сөмын гөрийөн сыла Мусө гөрны.

Ичөтик тай вөлөмыд тэ, Муөй,  
Уна кывъя войтырлөн важ позйыс!  
Медым он жө пөр тэ коркө гуө,  
Вежөдө мед пальмаыс и козйыс!

### *Асшөр олөм*

Коді полысь, коді колысь,—  
А ме ачым олөм олысь.  
Война кадсянь, ичөт дырсянь  
Ас нянь понда ачым мырся.  
Некод водзын абу мыжа:  
Аслам пелыса и пыжа,  
Аслам чера, аслам чомъя,  
Аслам пищала и понъя.  
Олөм шөрөдыс ог кылав.  
Сөмын водзөсаөн кыла:  
Сыысь, му вылас мый чужи,  
Сыысь, овнысө мый кужи,—  
Ставсьыс — паськөмысь и көмысь,  
Бур туй вылас сувтөдөмысь.  
Аттьө мамөлы и налы,  
Кодкөд долыд меным талун.

\* \* \*

Оз сөмын вужсянь сөвмы пу,  
Көть чужан мусьыс вынсө кыскө.

Эз эськө быдмы, эз кӧ ю  
Яр шондӱ дзирдсӧ тугья лыскӧн.

Ме ог тӧд, кузь-ӧ менам нэм  
И кутшӧм дон мен лоӧ бӧрын.  
Ме, гашкӧ, сӧмын ӧти ем,  
Но ловья пулӧн парма шӧрын.

\* \* \*

Войвыв ывла менӧ велӧдӧ,  
Мед ог мустӧмт лым ни зэр,  
Парма уджыс менӧ зӧлӧдӧ,  
Мед оз усьлы кийсь чер.

Быгья ытва менӧ ышӧдӧ,  
Бӧрнясьӧмӧн мед ог ов.  
Небыд корнас кыз пу кышӧдӧ,  
Кодысь гажтӧмасьӧ лов.

Югыз войыс менӧ ӧлӧдӧ,  
Мед ог янӧд рӧд ни вуж.  
Асья тӧлыс менӧ тӧлӧдӧ,  
Медым лӧгалӧм оз чуж.

Казьтылӧны пода туйясыс,  
Ыкша висьӧм мед оз босьт.  
Шойна ягын эжмӧм гуясыс  
Меным артмӧдӧны кост.

## *Ас сьылан*

Ми перьям из шом, нефть и газ,  
И вөр страналы сетам.  
А кымын сьылан мян ас,  
Кор бур йөз водзас петам?

Да абу уна, мый көть шу,  
И сёрнисö ме пана,  
Мед эськö эз ло Коми му,  
Кыз тöлысь öтар бана.

Эм көм и пась, и кынöм пöт,  
И мукöд колöм инö.  
Но таысь жугыльсö ог тöд,  
Кор ассьыд сьывны нинöм.

## *Совхозса директор*

*Г. А. Михайловлы*

Кок йылын да пызан сайын  
Бара колис лун.  
Сук чай стöкан пöсьöс вайин,  
Гортад он на мун.

Зутшкö сьöлöмыд, оз инась,  
Вежöсад көть чöv:

Мыйла катыдсалон чини  
Рытъя лысьтөм йөв?

Дас машина мунлис карө,  
Қыкыс эз на во.  
Эз-ө коркөя моз бара  
Туяс мыйкө ло?

Абу горзысь, да вот талун  
Бытьё воссис выть:  
Мыйла колө ПМК-лы  
Қадйө пырны быть?!

Қодкө трактор вильөс корө,  
Қодкө — вежны удж...  
Гортлань синма петан сөрөн,  
Ньөжмөдыштан сутш.

Ыштө суйис татчө рөкыд  
Ыштө кутө бөж:  
Қымын водзө, сымын сьөкыд  
Сымын уна төжд.

Ыштө каян помтөм кырйөд,  
Бөрад — сьөкта гез.  
Гашкө-й, танкад война дырйи  
Асьтө тадз эн пес?

Быдөн мортыд өти лола,  
Мөрчис жө нин, тон?  
...Сөмын аскиыс мед волас,  
Гортад лоан он!

## Морт нэм

Геронтология \*— кывсьö наука,  
Весигтö эм институт.  
Пöрысьман мортыд тай, мый сэсся шу  
кöть,

Сэтшöм нин усьöма пуд.  
Ноксьöмыс вичмö и шогыс на личкö:  
Олöмыд олöм на-й эм.  
Медтö наукаыс отсалö, сідзкö,  
Муртса кöть нюжöдны нэм.

Сöмын тай Лунвылö миянöс туйдö,  
Корсьö дыр олысьсö сэсь.  
Сё сайö арöса пöльöös чуйдö:  
Ен на пö, юрыс на сэзь.

Абу ме Лунвывса пöльöлы паныд  
Мед сійöс видзас на ен.  
Телепит лои наукалысь тани  
Отитор юавны мен.

Пöльöös тöда ме войвывса сиктысь:  
Йöзыскöд сибыд да ас,  
Быдтор на вöчö, оз мукöд моз никты,  
Тыртö кöть кökъямысдас.

Ыджыд тай арлыд! И тадз позьö шуны,  
Босьтны кö тöд вылö сё.  
Но öд и олöмсö ас вылас нуны  
Сылы эз этша жö ло.

---

\* Геронтология — наука, кодi тöдмалö-велöдö пö-  
рысьмöм.

Томясянь мыркӧдчис, вӧрысь да ваысь  
Гежӧда петавліс тон.

Сылы на уджйӧза «Комилес» таысь,  
Сетны кӧ ӧнія дон.

Вуджӧма лои и войналысь вояс,  
Невскӧй Дубровкалысь ад.  
Морӧсас вурыс и кокас, и сояс,  
Лӧк водзын овывлӧ мат.

«Ловтӧ он сьӧлышт, а коркӧ ӧд  
эштан!»—

Воча кыв мӧдӧс оз сет.  
Чипыртас винатӧ, бокӧ оз вешты,  
Тшынасьны сы бӧрын мед.

Кайтны кӧ дженьыда, мортыс эз довъяв,  
Нинӧмысь асьсӧ эз видз.

Ружтіс да туртіс! А век на со ловъя!  
Кызди нӧ сідз?!

### *Тӧдса коми пӧрӧдчысьяслы*

Ӧти делегацияын тӧкӧд  
Вӧлім коркӧ. Ачыл тӧдан — кӧн.  
Туйӧ петӧм водзвыланым сэки  
Чукӧстісны, сетыштны мед сьӧм.

Ок, кызд аньяс чиршӧдлісны тӧнӧ,  
Воманыс кӧть пукты вӧлі тас!  
Чайтісны, мый пӧкмелляйд венӧ,  
Сійӧн и оз артмы кырымпас.

А мый уджыд абу лым чир өктан,  
Налы тайё юраныс эз пыр.  
Бензопила — матё пудья съökта,  
Видлы сійөн пөрөдчыны дыр!

А тэ нельөд пятилетка дорвыв  
Лэдзан вөр, и ыштө эн на пөт.  
Быть сэк вөлі сувт да тэнө дорйы,  
Кыв йылын нин бергөдчыліс сөт.

Кымынөс нин төдлөма «маяктө»:  
Талун öзйө, аски — чис ни пис.  
А тэн абу уджыс коми ягтөг,  
Сэні — гажыд-долыдыдлы вис!

Коз ли пожөм... Видзөдлывлан, оз-ө  
Колан серти мөдарөджык пөр.  
...И со, кывсьө, вуджөмыд лесхозө,  
Медым водзөс быдтыны бур вөр.

Югыд вира, шоньд сьөлөм руа —  
Сэсся уна тэ йылысь ог доль!  
Тадз кө овны, пөльяс ногөн шуа,  
Чужан муным бөрдан оз на коль.

## *Гортын*

Локтан да мыйкө век камөдан:  
Мамөлөн уджыд пыр эм.  
Пыри ме тэрыба камодө,  
Лэчтысян абу-ө сэн.

Сымда квитанция, видзёда,—  
Тубырö идравлёмтор.  
Сэксянь на мамёлөн видзёма,  
Поставка мынтылім кор.

Сейёмсьыд оз вöлі сутшиктöd,  
Тшыг сорөн бергödчан во.  
Йöвтö, и яйтö, и кучиктö —  
Мый абу сдайтлёма со!

Отувья удж вылас зильёма,  
Та йылысь уна он доль.  
Войяснас аслыд на тильёма,  
Мед эськö мөстөг эн коль.

Дзескыдад-пöгибад волёма,  
Война пом тöдлёма шуд.  
Оти сор йöзыскöd олёма —  
Ошйысьны тайөн он кут.

Мамö тай асьыс век гаралö,  
Воас кор пенсия лун:  
Кодöскö удзöді бара пö,  
Дыр-ö нин Ягас ог мун?!

Бытьёкö дйтшвидзис гортын  
Сьökыдсö нэмнас эз пык.  
Мед сылы эз вичмы орденыс,  
Тöда — медальыс эм кык!

\* \* \*

*И. А. Поповлы, Печоро-Илычскöй  
заповедникса лесничöйлы*

Эм на пельöс чужан муын,  
Кытөн лөнью сьөлөм дой.

Ворсö комыс визув юын,  
Вомас баддьöн вуджö мой.

Джуджыд кырта суска вöра,  
Воом кольсö пылльö низь.  
Лапкор йириг, локтö йöра,  
Косысь котыр пуксьö-дизь.

Кырта улын йирыс пемыд,  
Муткыльмунлö вабергач.  
Он тöд, олысь сэнi эм-ö,  
Кызд тай сьöмга — ыз да швач.

Но со чусмö асья кыа,  
Кыськö тövныр петö кузь.  
Весиг вöрыс лоö гыа,  
Увгö, быттьö пеля сюзь.

Пуксям пыжö: он öд эштöд  
Вөр-ва видзан помтöм удж.  
И кызд садным, миян весьтöд  
Лэбö еджыд бöжа кутш.

\* \* \*

Быд мулön аслыспöлöс мич,  
Быд мулön аслыспöлöс козин.  
А меным муса вадор видз  
Да рас, кысь ельдöг вотны позьö.

А меным муса ягвыв пув  
Да кода мырпом васöd нюрысь.  
Ме тöда — натöгыс ог кув,  
Но тöда — сьöлөмöй оз бурась.

А меным муса джуджыд лым,  
Көн сьола-тарыс төвнас узьлө.  
А меным вой төв сетө вын,  
Мед некор сьөлөмөн эг усьлы.

А меным муса ойдөм ю  
Да пемыд вөр — мед абу помыс.  
А татөг вошта кокув му  
И розя грөш мен лоө доныс.

\* \* \*

Быдтор йылысь позьө гижны:  
Мый со ар, и корйыс виж нин;  
Мый со рыт, а муса ныв  
Оз на тыдав, оз на кыв;  
Либө, шуам, кызди коркө —  
Тэ он узь, а ёртыд шкоргө.  
Позьө гижны уна ногөн:  
Скөрысь, серампыр и шогөн,—  
Сөмын артышт, кутшөм могөн!

### *Куратовлы*

*«Менам муза — абу вуза!»*

*И. КУРАТОВ.*

И менам муза абу вуза,  
И меным торъя шуд оз ков.

Мен лымъя муыс тайо муса  
И чоскыд сылон нянь да сов.

И мено тась он тшынав лыскон,  
Ме ай-мам ордымысь ог кеж.  
И мено те моз вирой кыско,  
Кон парма — тов и гожом веж.

Ме ставсо сьолмомон тан кыла:  
И шонди гож, и кодзыд пуж.  
И те моз комион ме сыла,  
Коть, гашко, ог на бура куж.

Ми ого шогалой, кызд вайдор,  
Но коллом овсыны оз сет:  
Мед бур йоз водзас коми войтыр  
Эз лекджык сыланкывйон пет!

### *Илля Васьлон кувсьо м кузя*

Он нин аддзыв сийос тась,  
Мывкыд серни улас инась.  
Со и мунис Илля Вась  
Нэмыс кежло мян диньсь.

Эсько эз нин вов и том,  
Медым тадзи шого усьны:  
Быттьо сотчис ворын чом,  
Кытчо воывлим ми усьны.

Бытьё уна коми кыв  
Гуас сьёрсьыс сійё нуис.  
Век мед лоё сылы сыв  
Қоляозъя чужан муыс!

### *Отчыдысь волё*

Отчыдысь волё —  
Узьём ни олём,  
Сьёлөмыд косьмө,  
Дойыс пыр ёсьмө.

Шань эськө дойыс,—  
Оз тай коль войыс.  
Сы мында көсйём  
Нэм кежлө öзйө.

Ыджыд да мича  
Надея видзан,  
Баньд и гугыд  
Сөстём да югыд.

Пөсьлуныд туө,  
Визулөн нуө,  
Қылөдө сылань,  
Кодөс тай кылан.

Медтыкө суны,  
Қык кыв и шуны.  
Көсйылін сёысь,—  
Мый лоан лоыс!

...Өтчыдысь волö —  
Узьöм ни олöм,  
Шуд моз тэн усьö,  
Томдырөн шусьö.

### *Чужан да быдман*

Чужан да быдман,  
Инад он öшйыв.  
Быдлаö тырман,  
Шогтö он пöжлы.  
Зэв öдйö ыштан,  
Ас ныра овлан.  
Локтигөн гортад  
Сöмын и повлан.  
Вадорын — гажыд,  
Сынöдөн — пöтан.  
Кольöма ылö,  
Усьлö на вötөн.  
Усьлö на вötөн.

Том кадö воан,  
Гажтöм друг босьтö.  
Тшынöдö синтö,  
Сьөлöмтö косьтö.  
Öти тай муса,  
Уна кöть эмöсь  
Вунöдлан ськөд:  
Вöt али вемöс.  
Шондиа рытй,

Тöлыся войöй.  
Дум вылад волö,  
Кылö на дойöн.  
Кылö на дойöн.

Олан да вылан,  
Мыйсö он тöдлы.  
Сейöмысь öтдор  
Он сэссия пöтлы.  
Бара на унмыд  
Пышйöма ылö.  
Бара на мыйкö  
Сьöлöмыд кылö.  
Синваыд — курыд,  
Ньылöмыд — сола.  
Коркöя шудыд  
Медтö на волас.  
Медтö на волас.

\* \* \*

Коркö долыд, коркö шогö волан,  
Коркö, гашкö, ковмас сетны лов...  
Öти олём му вылас и олан,  
Да и сийöс кокныда он ов.

Пайтём мортыс некод абу татöн,  
Сьökыдыс мед сы вывтi эз мун.  
Олём чöжыд пыжөн быттьö катан,  
Визув паныд сынан лунысь-лун.

Весиг шудыд овлö курыд сора,  
Лючки-бура ставыс оз на ло,

Сэссия-й коркө овны таладорас  
Кольө тэныд сөмын лыда во.

Он и төдлы, сьөлөмыд друг сувтас,  
Кылан на көть олөмыслысь көр,  
Сэки уна-уна өшинь увті  
Вевта пыжөн кывтан татысь бөр.

Медым вөрыс мукөдлы сэк вашкө,  
Югуд мусө мавтө шонді-борд!  
...Но, а тэнө казтыласны, гашкө,  
Эз пө вөвлы шыбитана морт.

### *Элясьөм*

Ме ачым, шуны кө нин сідзи,  
Тшөтш сиктысь петөм. Абу чиг.  
И өнөдз пыр на вежавидзи,  
Эг казтыв лёкөн грезд ни сикт.

Но сэссия тырмас. Ог нин олөй.  
Мед сөмын кызкө вуджны во,  
А сідзкө, бурног овны колө,  
Мед некод дивитысь оз ло.

...Көть луныс кос, а няйтөсь туйөд  
Тэ собан, кокыд оз нин ну.  
И гөгөр ёг, да пес, да куйөд,  
Зэв гежөдлаын быдмө пу.

И керкаясыс — коді кытөн,  
Он аддзы важ моз төлк ни слөй,

И виччысь, пемыдджык кӧ рытыс,  
Мед киссьӧм юкмӧсӧ он вӧй.

Ли нӧшта кытчӧкӧ он веськав,  
Кысь он жӧ регыд бурӧн пет,  
И позьӧ лӧгалыштны эськӧ,  
Мый эм совхоз, и сельсӧвет.

Мый налы медводз тайӧ инмӧ,  
Мый налӧн босьтчӧмыс нин — вын!  
Но ми жӧ асьным быдӧн синма-сь  
И ки ни кокным абу кын.

А вот тай — лэдзчысим дай сідзи!  
А вот тай олам — шу кӧть эн!  
Но ӧнӧдз кӧ ме вежавидзи,  
То сэсся тырмас, зывӧк мен!

### *Кыддза рас*

Абу менам, абу тэнад —  
Эжва дорын кыддза рас.  
Векни ордым сэтӧ эм-а,  
Сэсся абу визь ни пас.

Ачыс быдмӧ, ачыс олӧ,  
Абу сы понда и шог.  
Но мед мыйкӧ ськӧд лолӧ,  
Кодкӧ вӧчас сылы лӧк!

Сэки вирыд пыр и пузяс,—  
Мичлун дінад абу кын.  
И он сёрнит сэки кузя,  
Лӧксӧ вӧчысь мед эз мын!

## Саръюдін

Саръюдінсянь, кырта йывсянь,  
Пемыд вӱрсӱ аддза вывсянь,  
Урал излысь аддза лӱз.  
Ылдыз юӱд пыриг катчӱс,  
Овмӱдчисны коркӱ татчӱ  
Узътӱм, повтӱм коми йӱз.

Мыйта уджсӱ мыркны ковліс,  
Лешмытӱдзыс мортлы овліс,  
Вой шӱр бӱрын усьліс сутш.  
Керка-картасӱ, эз инась,  
Лӱптис медся джуджыдінас,  
Кыдзи позсӱ вӱчӱ кутш.

Тані мортыд быттьӱ бордъя,  
Вӱрсӱ-васӱ синнад ордыан,  
Кӱть и кынд-кокыд рудз.  
Кучкӱ шонді кырта йылас,  
И ме вирӱн лючки кыла,  
Кыдзи мышкысь усьӱ мудз.

Ылдыз юӱ Сарью петӱ,  
Еджыд чери тӱльскӱ сӱтӱн,  
Муртса кывтыд вуджӱ ур.  
Чомкост ылын козъя вӱрас,  
Быттьӱ вольсалӱма дӱра,—  
Турипувъя вижов нюр.

Эськӱ овны сӱмын татӱн,  
Ветлӱдлыны ылӱ-матӱ,  
Но кыдз висьӱм, босьтӱ шог:  
Сиктыс кутӱма тай бырны,  
Ыштӱ югыдыс оз тырмы  
Либӱ вӱлӱгаӱн лӱк.

Вежынь керка, кнеёём жытник  
Абу өти, абу кык нин —  
Кольём пёрысьыслы пес.  
Суска ягын, көні рөмыд,  
Синмад выльыс усьё сөмын:  
Выльён пуктём сруб да крест.

Йөйөсь вөліны мөй найө,  
Кодлы мусмис ваыс тайө,  
Пемыд вөрыс лои ас?  
Али дышыс кутіс бертны —  
Асьсө сиктсө колө вердны,  
Сійөн сы вылө и тас?

Абу көкпи ловъя мортыд,  
Быдөнөс на кыскө гортыд,  
Но өд уджтөгыд он ов.  
А мый татысь киад шедө —  
Вөрыс мыччө, ваыс сетө,—  
Ыштө некодлы оз ков.

И со бара кодкө мунысь,  
Абу сиктлөн локтан луныс...  
Абу-й сьөлөмөйлы ин.  
Кучкөмысь моз сотчө бандзиб,  
Важ йөз водзас весиг яндзим,  
Мыйла бырө Сарьюдін.

\* \* \*

Коркө скөрмөмла ва моз тула кө,  
Гашкө, воштывла сэки юр.

Но ни винаён, но ни кулакён  
Эг на чуктөдлы аслым бур.

Татшөм туй вылас быттьө сувтны кө,—  
Мудер пон моз сэк лытө чөж!  
Сөмын эштылан лёкысь увтнытө  
Либө легөдны лэдзөм бөж.

Кодөс вермыштан — сійөс пурыштан,  
Кодөс он вермы — сыысь пов.  
...Биа ньөвнас мед енмыс вурыштас,  
Татчөдз усяс кө менам лов.

### *Машө тьөт*

— А мый нин пөрысьыдлы колө?!—  
Век шуө төдса Машө тьөт.—  
Ме, гашкө, талун-аски ола,  
А сэссия-й эшта, он өд төд.

И сідзи шуас, быть көть эскы,  
Оз весиг шпыньмун, ваш оз вөч.  
А карта саяс сымда пескыс,  
Мый мөд нэм овны тырмас стөч.

И керка вылыс дзик выль тьөскысь,  
И чер ни пила абу ныж,  
И абу эновтчөма мөскысь,  
И содтөд на сэн гоз-мөд ыж.

И самоварыд сылөн пузьö,  
И муртса пызаныс оз чег.  
— Көть,— шуö,— верöсöй и уси,  
А быттьö верöса на век.

\* \* \*

Коркö зильөн шулим сийöс,  
Кодлөн гаддьöсь вöли кыс.  
Кипом уджыс вöли уна,  
Быть сэк вöли тадзи шу на.  
Но öд олöмыс эз джöмды,  
Да и вежөрным эз рöмды.  
А вот ацдзан: мортыс зильö,  
Сьöкыд уджсö важ моз тильö,  
Юрсö уджөдны оз көсйы,—  
Мисьтöм кыв көть сэсся вöзйы,  
Ог ме лэпты öнi сийöс,  
Кодлөн гаддьöсь сöмын кыс!

\* \* \*

Медтöй гöна лёльö рöдмылас лун дас,  
Кушöдз эськö йирас небыд коръя рас.  
Гöна лёльö вылö петö миян лөг.  
Лөбач пнысь сийöс сөйö сöмын көк.  
Но ми тöдам көклысь сöмын öтитор,  
Мый оз ачыс быдтысь, татчö локтас кор.

\* \* \*

Оз нин сэтшөм уна ков  
Меным таладорас.  
Медым вөлі нянь да сов,  
Пывсян кежлө корось.

Медым новлөдліс на кок,  
Қытчө синмөй нуліс.  
Медым қутшөмкө да мог  
Асывсяньныс суліс.

Медым олөмсьыс эг ор,  
Сэтчө-татчө колі.  
И мед кодкө рытьядор  
Пукалыштны воліс.

\* \* \*

Қокньыда овны да чөскыда сөйны  
Менө тшөтш велөдіс кар.  
Мустөм нин сиктад мен уль мутө лойны,  
Нөшта — кор зэрласьыс ар.

Сөмын тай ыстөны бара совхозө:  
Қартупель идравны — мог.  
Отсөгыс меыс сэн лоө ли оз-ө,  
Он мун да — мөдарө лөк.

Аслым на яндзим дай видөмыс сюрө,  
Бурджык нин — ветлөма мед.

Шогөдан мөвпыс тай поздысьö юрö,  
Узьны ни овны оз сет.

Қымынөн сиктсаыс карлань ми сынiм,  
Ылысмим гортсьыным дзик.

Қарсаяс лоим да быттьöкö мынiм —  
Қыз кужö, олö мед сикт.

Йöйыс мед, колöкö, луасьö сэтөн,  
Шойчöг ни гажлун оз тöд.  
Вөлөм тай, водзöсөн мынöмыд петö:  
Он на куш кар уджнад пöт.

Қолö страналы зэв унатор көть и,  
Некодыр оз овлы лич,—

Кöсьян ли он ли, а видз-мутö вöдит,  
Содтöд на — пöсьлунтö видз.

Сиктыд кыз мам, сiйö вердö и удö,  
Но öд и сылөн эм дöz.

Огö кө сы вöсна тöждысьны кутöй,  
Мыйся нö лоам ми йöz?

Отсöгыд — отсөг, а медтö-й став уджным  
Инмис тшötш сиктыслы, вот!

Сэк пö тай долыджык вөлöктö вуджны,  
Қок пөвнад кодыр он чот.

\* \* \*

Кутшөм эм, а гөтыр эм  
Енэж улас менам.

Өти пыжөн вуджам нэм,  
Төв паныдсө венам.

Оз ков сөмын сям да вын,  
Югзьө мед и лолыд.  
Он кө сьөлөм вывсьыд сын,  
Водзө он и волы.

Шөрө петөм бөрад сёр  
Корсьны лөньө кежд.  
Кор ме бөжала, а кор  
Гөтыр менө вежө.

Коднымкө сэк панлам зык,  
Пуксьыны мед вылө.  
Веськыда кө, артмөджык  
Бөжалөмыс сылөн.

Вундө пыжным гы ва,  
Лючки нырсө кутө.  
И ме, чайта, шуа на  
Коркө тайөс шудөн.

### *Ошйысьөм*

Көн нин эг вөвлы да көн нин эг узьлы,—  
Ас вөсна бөрыннас юрөй эз усьлы.  
Көн нин эг арыыв да көн нин эг пывсьыв,—  
Лёк юөр ас бөрся гортө эз кывсьыв.  
Көн нин эг пукавлы, көн нин эг юлы,—  
Медбөръя кывсө эз некод на шулы.  
Лысьта на гортысь, кыз шуасны, петны.

Дзик на мен нинѳмысь ныр-вомѳ сетны.  
Гашкѳ нѳ, тырмыліс морттуйѳй, сямѳй,—  
Эз жѳ ѳд лѳк вылѳ велѳдлы мамѳй.  
Бурсѳ эг сьѳлавлы, няйтас эг дзугсьыв,  
Сѳмын мый коньѳрѳ некор эг пуксьыв,  
Но и эг лѳптысьлы, кодѳскѳ сконъяв,  
Ачымысь улѳджык мортѳс эг донъяв.  
Ошйысьны-ышнясьны ог кѳть куж вексѳ,  
Татшѳмсьыс, шуны кѳ, ог аддзы грексѳ.

\* \* \*

Ог нин ризъяв,  
Қыті изъя,  
Лунтыр ва дорын ог ов.  
Сѳмын овлѳ —  
Скѳрмѳм ковлѳ,  
Медым нинѳмысь эг пов.

Ог нин видзѳд,  
Коді мича,  
Видчысь гѳтыра нин кѳн.  
Сѳмын овлѳ —  
Доймѳн ковлѳ  
Петны гортысь гудѳкѳн.

Ог нин ышмы,  
Бытьѳ дышми,  
Весиг кодѳн шань да бур.  
Сѳмын овлѳ —  
Вежпет ковлѳ  
Муртса воштывны кѳть юр.

Ог нин вѳтѳн  
Кадсѳ вѳтѳд,  
Инѳ вѳтѳмсѳ ог доль.  
Сѳмын овлѳ —  
Бѳрдмѳн ковлѳ,  
Нинѳм жальѳн мед эз коль.

### *Менам геройяс*

Сѳтшѳм шудтѳм ѳтчѳд лоис,  
Сьѳлѳмѳйлы дзескѳд:  
Быттьѳ нѳм помѳй нин воис,  
И дзик ставлы веськодѳ.

Сѳки-й кодкѳ, ланьт кѳть чиктив,  
Пырис кува-кова.  
Видзѳда да: Вилядь сиктысь  
Анна Конакова.

Ог на эскѳ: вѳт-ѳ-вемѳс,  
Ог на панѳд вѳрзѳы.  
Видзѳда да: Конѳ Семѳ,  
Мыжа Наста — бѳрсьѳс.

Мый мен сьѳкѳд, абу-й дырѳн  
Кывсьѳма дзик ставлы.  
Даньѳ Иван, аддза, пырѳ,  
Педѳра и Павла.

Бара сьѳлѳмѳй оз инась,  
Нюмѳй — шердын пасѳта.

Гудѡка на, нывъяс дїнысь  
Локтїс Макар Васька.

Пукалїм сэк, кыдзи колѡ,  
Вѡлыштїс и юны.  
Митьѡ Питьѡ весиг волїс,  
Мукѡдсѡ ог шу нин.

### *Бурасьѡм*

Сэтшѡма мен ковлѡ мукѡд пѡрїѡ,  
Медым выльѡс гѡтыр аслым бѡрїи.  
Тайѡс жѡ, ме кодкѡд ѡнї ола,  
Сюра чѡртыс босьтас медым колѡ-к.  
Мый нѡ, менѡ, уськѡдчас да, видѡ,  
Быттьѡ пѡ ме вежѡртѡм ни китѡм,  
Челядьным пѡ ме кодьѡсь жѡ дышѡсь,—  
Быд тувччѡмысь аддзѡ менсьым мыжѡс.  
Ачыс гѡгѡр шань да век на мича,  
Сѡмын месѡ лѡка сїйѡс видза,  
Ќтитор оз волы меным юрѡ,  
Мойвиис мем коркѡ кутшѡм бура.  
А ме ог тѡд, мый сылы и шуа,  
Сѡмын ныр пыр лолала да пуа.  
Бѡръя лун-вой, чайта, ола ськѡд,  
Аскѡдыс мед пырѡ сѡсся зькѡ.  
Но сэк кыла: керка тырѡн гора  
Нимѡн менѡ чукѡстѡмѡн корас.  
Мыччас ньѡбас — шнич выль костюм пара,  
И ме, йѡйыд, бурася сэк бара.

## Пӧчӧ

Вежыс сэтшӧма кӧть петлӧ,  
Оз нин ӧшйы кнас удж.  
Улӧс-кокӧн муртса ветлӧ,  
Порог вомӧн оз нин вудж.

Ӧшинь дорын пыкӧ норсӧ,  
Воймӧм синсӧ тилигмоз.  
Дольӧ-лӧвтӧ ӧтиторсӧ,  
Кодкӧ-й кывзӧ али оз.

«Эм кӧ, шуӧ, кӧнкӧ енмыс,  
Мый оз чукӧст татшӧм дыр?  
Али эг на бура кевмысь,  
Али грекӧй юрвывтыр?»

Ньӧти гректӧмыс, дерт, абу:  
Он ӧд пысав вомад тас.  
Сӧӧн матькылі, кӧть баба,  
Кослунъя ни пернапас.

Уджыд — норма, няньыд — норма...  
Астӧгыд на куим вом...  
Кор на быдмасны да кор на  
Воас синваыдлы пом?

Бытьӧ кужысьӧн и чужлі,  
Тэчлі пач и зэвтлі пур.  
Сӧмын гусясьны эг кужлы,  
Гусьӧн некодӧс эг пур.

Либӧ верӧс усьӧм бӧрын  
Кымын сибӧдчысь эз вӧв?!

Юр яндзимөй вөлі сьöрын:  
Кигуг öвтышта — и чөв!

Коркө мелі, коркө тоткан:  
Мамыдлы пö öти дон.  
Быдті куимөс, да кодкө,  
Гашкө, шпана лои тон?

Ог тöд, райысь али адысь —  
Қытысь вичмас меным ин.  
Аддза, воöма нин кадыс,  
Кувны эськө колö нин.

Сöмын дөзмөдча нин тані,  
Ну да гуранö көть вöйт.  
А вот локтö пон и, кань и —  
Некод на оз бокөвöйт.

Мыйкө... дыр на öмөй ола,  
Кор оз кывзысь ки ни кок?  
Көть мед дявöлыс нин волас,  
Вермытöгыд — ок-ок-ок!»

\* \* \*

Кор өртөс гуалім, сэк юим  
Да восьса синмөн гора шуим,  
Мый огö вунөдөй. А öні  
Ог аддзөй, гашкө, гуыс көні.  
Ми сэсса сэтчө эг на волөй,  
Қөть қутам төд вылын, мый колө.

Ми олам-зілям водзё вылө,  
И некор овлө песны кылөн.  
Ми, кытчö чукöстасны, петам  
И отсöг кевмысьтöг на сетам.  
Но, овлө-й, корсям сьöлöм личöd  
И бырны кутіс вежавидзöм.

### *Кытчö лэбö вертолёт?*

Козья вөрлысь пемыд от  
Шөралö Печора.  
Ургö-лэбö вертолёт —  
Шыыс сэтшöм гора.

Кытчö лэбö, кутшöм мог —  
Тайöс тöдан мыйөн?  
Гашкö, көнкö ыджыд шог —  
Кодкö кулан выйын?

Гашкö, көнкö бөрья во  
Рöдмис уна кöин?  
Гашкö, мыйыс друг эз ло  
Ылыс бурөвöйын?

Гашкö, чукөрмис дзöнь борт  
Сиктö почта тырөн?  
Гашкö, кодкö чина морт  
Тупкöс юö пырö?

Абу ывлаыс тай лөк,  
Буретш сьöмга катö...  
Ургö-лэбö вертолёт —  
Тыдалö, оз матö.

## *Рочьяс йылысь*

Некор, некор оз вунлы:  
Менам эм воча чой;  
Шуис роч сайӧ мунны,—  
Мамыс муртса эз сӧй.

«Кыдзи роч сайӧ лысьтӧ?  
Эз мӧй сюр кодкӧ мӧд?»  
Уна синва и кисьтіс,  
Уна лэдзис и сӧт.

Сӧмын эз вермы кутны  
Ассьыс ичиньӧ кыв.  
И со сэтысянь шуда  
Сылӧн роч сайын ныв.

Ме ог став рочсӧ лыдды  
Бурӧн. Овлӧ и дур.  
Но ӧд, шуны кӧ быттьӧ,  
Абу-й быд коми бур.

И ог ичиньӧс дзескӧд  
Аслам серамӧн ме.  
Кык народ костын эскӧм  
Вӧлі ляпкыд на сэк.

Ӧні олӧмыс мӧд нин,  
Абу татшӧмыд шоч.  
Кодлы окота тӧдны,  
Сылы ог кут ме нӧдны,—  
Аслам гӧтырӧй роч.

\* \* \*

Ме война вылӧ муні кор,  
Сэк гоҗся луныс вӧлі сылӧ.

А сэсся воис юёртор,  
Мый воши кёнкё война вылас.

Но ме сэн некытчö эг вош,  
Эг пленö веськав, ни эг сетчы.  
Ми колим видзны мир туй вож  
Да öтитöг ми усим сэтчö.

И менам вöлі мам да горт,  
И ме эг сувтлы враглы мышкөн.  
Но мыйла войнаыслөн борд  
Став вошöм йöзсö öтмоз чышкö?

Мен аслым нинöм нин оз ков,  
Ме важөн пыри пыді гуö.  
Но менам лэбалö на лов  
Да волывлö на Коми муö.

Кызд öтка лэбач, шыв да шыв  
Вөр весьтöд лэбö сійö сёрөн.  
А сэсся кежö рытивыв  
Да мунö Старöй Русса дорö.

### *Кымын герой миян?*

Оз, кольöм войнаыс оз вунлы!  
Эз этшаён Комиысь мунны,  
Но этша морт гортас бөр воис.  
Геройён жö — кымынкö лоис.

А полысьён öмöй нö чужлім  
И водзсасыны эг öмöй кужлöй?

Ми важысянь дорйим Россия  
И некор эг лэптывлөй кияс.

И ковмис кор дорйыны бара,  
Став пармаон кыпөдчим яра.  
И кымынкө коли на луныс,—  
А комиыд кызвыныс муніс.

И муртса на ньөжмөдліс поезд,  
Вагоньяссиянь — веськыда бойө!  
Өд комиыд быдөн дзик кыйсис  
И велөдтөг мичаа лыйсис.

Но вөрөг сэк вынаджык вөлі  
И зырөдіс весьтас и пөлөн.  
И сувтөдны сійөс сэк колі,  
Көть кыкысь мед петалас лолыд.

А лолыд өд быдөнлөн өти,  
А петас кө — оз ло нин ньөти.  
И комияс рочьяскөд радөн  
Сэк водісны. Налы награда

Эз удитны гижны ни сетны,  
И славаыс налы эз петлы.  
И найөс куш төдам ми, кодлысь  
Сэк вермисны пасйыны подвиг.

Но сы вылө-й сьөлөмным миян,  
Мед видзны сэн пармалысь пиян —  
Дзик ставнысө казътывны-видзны,  
Кор дорйис сэк талунья мичлун,

Код воськовтіс биө, эз тірав,  
Көть веськаліс медводдза нырас.

## *Ми туйынӧсь*

Зэв вӧлі гажа ва дор кырйын,  
Но воис июнь 22-ӧд лун...  
И мый ми тӧдлім война дырйи,  
Оз сайкав, кувтӧдзным оз вун.

А ӧні быдтысям ми асьным  
Да видзам быравлытӧм дум:  
Мед оз жӧ миянлӧн моз пасьмун  
Ми быдтасьяслӧн югыд нюм.

И медым овывлӧ на дзескыд,  
Оз быдтор тырмы на, кыз ва:  
Но ме правительстволы эска:  
Ракетнӧй миян эм войска.

Эм мукӧд пӧлӧс гырысь вынъяс,  
Мед видзны — дорйыны ас му.  
...Ми туйынӧсь, ог сувтӧй джынъяс,  
И оз босьт веськодясян ру.

## *Ов, республика, да нима*

Тэнад вӧрыд, тэнад юыд,  
Войтӧв улын лымъя муыд —  
Ставыс муса, ставыс дона,  
Гажӧй бырӧ тэысь ёна.


Аслад нима,  
Қоми нима,

Ов, республика, да нимав!  
Ов, республика, да нимав  
Воысь во!

Тэнад нылыд, тэнад пиыд  
Повтөг пыравлісны биё.  
Гörда олöмыслөн шонді  
Чужöмсяньыд тэнö шонтö.

Тэнад уджыд, тэнад гажыд  
Ывла тырөн юргö важөн.  
Шуда туйöд аски лунас  
Чой-вок котырын тэ мунан.





## *Кöка вайяса му*

Кыа чышъяна вой лöньöм вöрыслы мойдö,  
Слуда горулын ыркыда лолалö ю.  
Кыскö дугдывтöг сьöлöмöс, быттьöкö войтöв,  
Кыскö вöтөн и вемöсөн чармаа му.

Лöза-вежöда му,  
Кöка войяса му,—  
Таысь мичаыс мыйкö мöй эм-ö!  
Шуда кодзува му,  
Сьöлöм дорана му,—  
Тайö Коми республика менам!

Пöрысь вугралö коз. Коръя пуясыс шаньöсь.  
Эзысь югыда ывласö синнад он судз.  
Медся чöскыд да пöтöс тан ваыс и няныс,  
Медся кокни да муса тан удж бöрын мудз.

Ваймö ва дорын би, усьö югöрыс юö.  
Небыд лов шыөн тöдлытöг сибöдчö ун.  
Ай-мам сёрниа долыдан ас кокув муöй,  
Нинöм вылö да некор ме татысь ог мун.

## *Коми муöй*

Ворсö шондi Эжва юын.  
Чужи-быдми Коми муын.

Вирён кыски сылысь мичсö —  
Гулыд ягсö, ва дор видзсö.

Коми муöй — вежабанöй,  
Югыданöй, долыданöй.  
Олан гажöй, сьöлöм руöй —  
Коми муöй!

Уна ордым локтö-ликтö  
Лунö бана чужан сиктö.  
Коркö тані, кага на ме,  
Коми ногөн шуи: «Мамö!»

Коми муöй — айöй-мамöй,  
Вынöй-бордöй, тöлкöй-сямöй.  
Олан гажöй, сьöлöм руöй —  
Коми муöй!

Гожъялöны төв и гожöм  
Коми войтыр ывла гожөн.  
Пывсян бöрын сöмын найö  
Ылавлöны пызан сайö.

Коми муöй — няньöй-солöй  
Чöскыд унмöй, кыпид лолöй.  
Олан гажöй, сьöлöм руöй —  
Коми муöй!

Рытъя кыа сёр лэбалö,  
Сöстöм шыыс йöлöгалөн.  
Мыла гора коми сьылöм  
Пуксьö лючки сьöлöм вылö.

Коми Муöй — шудöй-пöтöй  
Рытъя мойдöй, асья вöтöй.  
Олан гажöй, сьöлöм руöй —  
Коми муöй!

## *Муста-Тунтури*

Рытив-войыс пасьтала  
Кыа биён гөрд.  
Мурманск дорысь казьтыла  
Урөс пуа сьорт.

Чизыр вой төв швичөдө,  
Турдө весиг из.  
Сьөлөмтө мед личөдны.  
Разян көлыс кизь.

Войбыд бой и лунтыр-и,—  
Оз кө смертьыд су.  
Ок тэ, Муста-Тунтури,  
Сьөлөм кырлан му!

Кодкө бара вируля,  
Гырдөдөма лым.  
Юр весьтад и ныр улад  
Сыркакылө гым.

Шуөма кө сулавны,  
Пиньтө йир да видз.  
А мый ковмас кулавны,  
Быдөн төдө сідз.

Мед оз яндысь висьөмысь,  
Коді төдліс бой.  
Кылө пөрысь лы-сьөмыд  
Уна вося дой.

Ывла вежсьөм водзвылын  
Нёрпалан, он узь.  
Бур нин көть, мый кодзулыд  
Эз на тэнад усь.

## *Шондіөй-мамөй*

Лыддыны кутан кө, сиктаным миян  
Сө керка ставыс оз ло.  
Мунисны фронт вылө батыяс да пиян,—  
Сө сайө морт бөр эз во!  
Гортө эз во!

Шондіөй-мамөй!  
Помтөм ывласө югзөд,  
Аски асывсянь лок.  
Тэнад югөрыд сьөлөмө пуксьө,  
Көні палявтөм шог.

Медся бур войтырыс пуктисны ловсө,  
Дорйисны шондіа лун.  
Сы вөсна миянлы му вылас овсьө,  
Сы вөсна нинөм оз вун!  
Некод оз вун!

Тышын ни уджын ми ог кужөй повны,  
Сөнъясын — батыяслөн вир.  
Овны кө му вылас, бурөн мед овны,  
Му пасьта вөлі мед Мир!  
Шондіа Мир!

## *Он тай, вөлөм*

Луныс, майбыр, югыд шондіа,  
Долыда көть сывны понда-а.  
Он тай, вөлөм,

Шогтö öлöд,  
Луныс кöть и югыд шондiа.

Гашкö, кодлөнкö и вунiс нин,  
Кымынөн тась коркö мунисны.  
Он тай, вöлöм,  
Шогтö öлöд,—  
Гашкö, кодлөнкö и вунiс нин.

Ылын-ылын юрсö пуктöма,  
Сьöлöм дiнсьыд кодi чуктöма.  
Он тай, вöлöм,  
Шогтö öлöд,  
Мусаыд кö юрсö пуктöма.

### *Гажа эськö ю сайыс*

Гажа эськö ю сайыс,  
Оз тай шонты лов.  
Кодi медся мусаыс,—  
Виччысьны оз ков.

Луннас эськö кытөнкö,  
Войсö тай он узь.  
Мыйла шудыс быдёнлы  
Откодя оз усь?

Петан кöть да собалан,  
Бытьö суис мог.  
Сьöлöмыд сiдз топавлö,  
Гортад кöть эн лок.

Гажа эськӧ ю сайыс,  
Оз тай шонты лов.  
Коді медся мусаыс —  
Виччысьны оз ков.

### *Визувтӧ Эжва*

Козъя вӧрті, лыс увті  
Ичӧт Эжва визувтӧ,  
Ичӧт Эжва визувтӧ,  
Паськалыштӧ век.  
Эжва дорын чужи ме,  
Югыз ванас чужӧмӧс,  
Югыз ванас чужӧмӧс  
Мыськис мамӧ сэк.

Гыалӧ Эжва,  
Ме дінӧ кежлӧ,  
Сиӧ меным шуд.  
Олӧмӧс юалӧ,  
Меліа шуалӧ:  
— Шогавны он кут!

Шонді югӧр визь увті  
Ойдӧм Эжва визувтӧ,  
Ойдӧм Эжва визувтӧ,—  
Потӧ пулӧн кор.  
Эжва дорын сьывлі ме,  
Тувсов рытӧ кывлі ме,  
Тувсов рытӧ кывлі ме  
Гусьӧн шуӧмтор.

Джуджыд слуда — из увті  
Ыркыд Эжва визувтө,—  
Ыркыд Эжва визувтө,—  
Бара гожом пом.  
Эжва дорын нылалі,  
Уна ва нин кылаліс,  
Уна ва нин кылаліс,—  
Сьолөмыд век том!

### *Чужан му төдөны юсьяс*

Чужан му төдөны юсьяс,  
Сэн сөмын аддзөны шуд.  
Төв паныд лэбөны кузя,—  
Нинөм оз кут.

Кылам, донаяс, кылам,—  
Ваяд шондіа лун.  
Мича тіялөн сылан:  
Клін-клун, клін-клун, клін-клун.

Өтвылысь олөны юсьяс,  
Кельөбөн лэбөны век.  
Кодкө кө сьолөмнас усяс,  
Оз кольны сэк.

Радейтны кужөны юсьяс,  
Гозья кост мусаөсь нэм.  
Бытөны пиянсө сюся,  
Қымын көть эм.

## *Лэчча ва дорё тулыснас*

Лэчча ва дорё тулыснас,  
Пода туйысь ог кеж.  
Небыд корнас да пу лыснас  
Гөгөр ывлаыс веж.  
Пукся ва дорас, видзёда,—  
Меным уна оз ков.  
Сэки ыджыда-ичёта  
Ветлө морёсын лов.

Шондібанёй дай олёмой.  
Некор тэысь он пёт.  
Дас квайт арёсё волёмой,  
Сьёлөм кылёмой, полёмой,—  
Коді тайёс оз тёд!

Абу энотём, вунөдөм,  
Абу кылалысь пу.  
Шонді улёдыс муна да,  
Гөгөр ас чужан му.  
Тайё муыс и мыджёдыс,  
Сьёлөм сетысьыс мен.  
Тані ачым ме ыджыдыс,  
Медся шогыс оз вен.

Шондібанёй дай олёмой,  
Некор тэысь он пёт.  
Комын арёсё волёмой,  
Ёрта-ёртыдлы колёмой,—  
Коді тайё оз тёд!

Тувсов вөр-ваыс шыалё,  
Бурёс туналё тэд.  
Тіпкө сьёлөмыд, гыалё,  
Лөня овны оз сет,  
Эськө төвтө эн чужъявлы,  
Мый эз тэ вывті мун.

Но кӧть юрситӧ пужъялӧ,  
Век на зэв уна дум.

Шондѣбанӧй дай олӧмӧй,  
Некор тэысь он пӧт.  
Уна арлыдӧ волӧмӧй,  
Овны кужтӧмысь полӧмӧй,—  
Коді тайӧс оз тӧд!  
Шондѣбанӧй дай олӧмӧй,  
Некор тэысь он пӧт!

### *Лымъялӧ ли зэрласьӧ*

Лымъялӧ ли зэрласьӧ...

Кытчӧ-й кадыс тэрмасьӧ?!  
Мыйджык медся дольӧма,  
Сійӧ-й жальӧн кольӧма.

Сьӧкыд уджсьыс пӧтлӧма,  
Синва кӧрсӧ тӧдлӧма.  
Быд ногыс нин овсьӧма,  
Абу сӧмын повзьӧма.

Винӧв мортыд, вӧлӧмыд,  
Тіпкӧ на век сьӧлӧмыд.  
Ышман выйӧдз волӧ на,  
Мыйкӧ сылы колӧ на.

Тшынав кӧть тэ лыскӧн-а,  
Кодкӧ дінӧ кыскӧ на.  
Кадыс тай вот тэрмасьӧ,  
Лымъялӧ ли зэрласьӧ...

## *Вой шөр войо*

Югыз войыс кокни онма,  
Синма-пеля овло сикт.  
Вой шөр войо ныла-зонма  
Восьлалоны гусьоник.

Эно вөйпөй, эно торкөй,  
Мед но лөсялөны, мед.  
Асьныд вошлывлінныд коркө,  
Кытчөдз шондїыс оз пет.

Луныс кольо, рытыс волө,—  
Бара сьолөмыд оз ин.  
Көнкө олыштны сэк колө  
Шы ни төв да син на син.

Ныла-зонма ашөр дойнас.  
Бура йитасны кык лов.  
Коді кодкөд вөлі войнас,  
Төдны мукөдлы оз ков.

## *Кыддза-козья*

Тэныд-меным колө өні  
Овны татчөс пуяс моз.  
Со тай орччөн сулалөны  
Еджыд кыз да джуджыд коз.

Вежыд петө,  
Сьолөм сетө:

Эськӧ на моз овны век.  
Кыддза-козъя,  
Быттьӧ гозъя,  
Быттьӧ тэ да быттьӧ ме.

Вичмӧ налы чизыр войтӧв,  
Вичмӧ налы шонді гож.  
Ӧта-мӧдсӧ абу дойдӧм,  
Ӧтсор налӧн вуж и вож.

Вылын юраӧсь да шаньӧсь,—  
Гажӧдӧны чужан му.  
Нэмыс кежлӧ томысянныс  
Лӧсялӧмаӧсь кык пу.

\* \* \*

Югыз вӧлі сійӧ войыс,  
Кувны кута, да оз вун.  
Эг и мынлы сьӧлӧм дойысь,  
Эг и тӧдлы чӧскыз ун.

Морӧс улын пӧжи тэнӧ,  
Ӧнӧдз сэтысь кыла на.  
Ог тӧд кодӧ, морт-ӧ, ен-ӧ,  
Абу меным шулӧма.

Важсӧ казтыла ме бурӧн,  
Лӧкӧй тэ вылӧ оз пет.  
Эськӧ коркӧ ловъя юрӧн  
Паныд лӧсявлыны мед.

Ог ме повзы, ог ме ойӧст,  
Гашкӧ, весиг петас нюм.  
Югыз вӧлі сійӧ войыс,  
Кувны кута, да оз вун.

\* \* \*

Бара гудӧк кылӧ татысь,  
Бара сӧлӧмыдлы нор.  
Оз нин волы сійӧ кадыс,  
Ныла-зонма вӧлім кор.

Дыр оз вӧлі пуксьы шонді,  
Рытыс вӧлі дыр оз лок.  
Сэсся нинӧм, нинӧм понда  
Эгӧ тӧдлӧй сэки шог.

Чайтан вӧлі шудтӧ водзысь,  
Гозйӧн олан-вылан бур.  
Ӧні луныс овлӧ шочыс,  
Медым синваыд оз тюр.

Бӧр он курав киссьӧм ватӧ,  
Бӧр он ӧшӧд усьӧм кор.  
Оз нин волы сійӧ кадыс,  
Ныла-зонма вӧлім кор.

### *Ӧдйӧ пуксьӧ асылыс*

Зонмыс эськӧ колана,  
Но ме сыысь полана на,

Аслыс кӧть ог шу.  
Мыйкӧ сыкӧд лолывлӧ,  
Зэв ыджыда лолалӧ,  
Босьтӧ тӧдтӧм ру.  
Эжва дорын лолаліс,  
Мир туй вылын лолаліс,  
Керка сайын лолаліс,  
Юкмӧс дінын лолаліс,  
Кильчӧ помын лолаліс,—  
Қыв эз сетлы.

Қоймӧдысь дай нельӧдысь  
Сійӧ менӧ колльӧдіс,  
Қутіс локны ун.  
Ыджыдавыны лысьта нин,  
Гортас сійӧс ыста нин,  
Сулалӧ, оз мун.

Эжва дорын сулаліс,  
Мир туй вылын сулаліс,  
Керка сайын сулаліс,  
Юкмӧс дінын сулаліс,  
Кильчӧ помын сулаліс,—  
Он ӧд вӧтлы.

Ӧдйӧ пуксьӧ асылыс,  
Скӧрала нин ас вылӧ,  
Мыйла ветла дыр.  
Зонка мекӧд шогалӧ,  
Бара менӧ окалӧ,  
Мед ме ог на пыр.  
Эжва дорын окаліс,  
Мир туй вылын окаліс,  
Керка сайын окаліс,  
Юкмӧс дінын окаліс,  
Кильчӧ помын окаліс,—  
Дыш и пырны.

## *Кокöй менам, кокöй*

Коркө зэв на томөн  
Петі кильчө помө.  
Чайті, мыйкө дыра  
Олышта и пыра.

Кокöй менам, кокöй,—  
Долыдöй и шогöй.  
Долыдöй и шогöй,  
Шы кывзытөм кокöй!

Том олөмыд öтчыд:  
Гудөк бөрся вөтчи.  
Гортө мөдар бокті  
Вой шөр бөрын локті.

Сьөлөмтө он тасав,  
Қыскө, быттьө васа.  
Этша тэныд луныс,  
Рытнас бара мунысь.

Коді медся колан,  
Сы вөсна и полан.  
Мөдлы мед оз веськав,  
Войбыд йөктан эськө,

Ачыс кокöй лудө,  
Мыйөн кыла гудөк.  
Тайө гудөк улас,  
Аттө-й, коркө кула!





## *„Чушканзілы“ нимлун кежлас*

Рөдтө кадыс. Қывсьө со нин:  
«Чушканзілы» кызь вит во нин.  
Сымда во жө, висътавны кө,  
Лючки лөсялам ми ськөд.  
Өткодъ миян ыджыд могыс —  
Вужнас бертны, мый эм лөкыс.  
И ме сиа «Чушканзілы»,  
Мед эз пөрысьмы да зілис  
Водзө вөчны уджсө тайөс,  
Қытчө ме тшөтш пукта пайөс.

### *Төдса Васса*

школа тырон видчө Васса,  
Тэрыб вом.  
Оз сет писө коми классө,  
Да и пом.

Дзик пө нинөм коми кывсьыд,  
Қыз көть шу.  
Он пө сійөс малышт вывсьыд.  
Сөй ни ю.

Сытөг быдлаө пө писътан,  
Мун да ов.

Медым лоны трактористөн —  
То оз ков.

Сөмын юридлы пө сійө  
Содтөд нок.  
Коми классө пө мед пиөс?!  
Ог и ог!

Сэсса пызанө тай кучкис:  
— Вот и став!  
А өд, мөвпышты кө лючки,  
Сійө прав.

Мыйла сылы төдны колө,  
Кутшөм гаж,  
Дыр-ө кысьсө коми олөм,  
Зэв-ө важ!

Мыйла висяс кыткө сылөн,  
Петас веж,  
Оз кө кывлы коми сьылөм,  
Коми теш!

Мыйла босьтны сылы матө,  
Лолыс көн,  
Коркө гижліс мый Куратов  
Комиён!

Мыйла сылы Виктор Савин,  
Кытчө тон?!  
Тшак ва сылы тайө ставыс,  
Зырым дон.

Пондас сійө мый оз ковнас  
Тыртны юр!  
Сылы сідзи лөсьыд овны,  
Гөгөр бур.

Эм и верös, и машина,  
Куим порсь.  
Йöйсö татшöм шудыс динö  
Оз öд корсь!

Но и пиыс мед оз йöйтав,  
Быдмас кор:  
Коми кывсьыд чöлкөвöйтö  
Он на дор.

Оз на сытöг луныс помась,  
Морыс лый.  
А мый ачыс Васса коми...  
Но и мый?!

Гашкö, сэтшöмöсь жö лоам  
Ме ли мöд!  
Сöмын кытчö сэки воам...  
Ме ог тöд!

### *Дачаяс йылысь*

Кар сайын, көн ю ли шор,  
Сэн и дача.  
Эм и менам керкатор,  
Весиг пача.

Эм и йöр да гоз-мöд град  
Вомөнногыс.  
Öнi ачым абу рад:  
Сымда нокыс...

Медым кысьыд чер ли зыр  
Сэн эз усьлы.

А ме волывладжык пыр  
Сөмын узыны.

А вот йөзыс! Абу дон  
Налы сэтөн:  
Быттьө уджалөны тон  
Поплы медөн.

Оз тай дышныс налөн пет,  
Оз тай висьны.  
Эг на аддзыв, тадзи мед  
Жугөдчисны.

Оз тай вот законыс лэдз,  
Водзвыв дойдө,—  
Эськө лэптасны дворец,  
Кызди мойдын.

Меным краскаыд оз сюр,  
Либө тольыд.  
Налөн гөгөр дзим да дзурк  
Шылыд-мольыд.

Налы куйөд и бетон  
Ачыс локтө.  
Сөмын вештөны-ө дон,  
Тайөс ог төд.

И он кывтө налысь кый,  
Шу көть көні.  
Морт оз висьтав, кытысь-мый  
Судзөдөны.

Мися, важся оласног  
Оз нин сирась.  
Вөлөм, кымынлөн на со  
Көнкө вирас.

Мед нӧ, кодлы абу дыш,  
Этша узьӧ.  
Мыйла сӧмын, кызди шыш,  
Овны гусьӧн?

Тадзи горшлунтӧ он ви —  
Он кут пӧтны!  
Овны ов, но колӧ и  
Садьтӧ тӧдны.

### *Важ мойд*

Кӧні вӧрыс джуджыд козъя,  
Кӧні юӧ усьӧ ю,  
Коркӧ олӧмаӧсь гозъя,  
Вӧчӧмаӧсь видз да му.

Лэптӧмаӧсь керка-карта,  
Быдтӧмаӧсь мӧс да вӧв.  
Ӧти кывйӧн, инӧ-артӧ  
Найӧс сулывлӧма тӧв.

Оз ков петны ылі туйӧ:  
Аслад нянь и аслад сов.  
А мый уджсьыд коскад суйӧ,  
Сытӧг му вылад он ов.

Эз на кывсьыв татшӧм серӧс,  
Медым кодкӧ ёрис удж.  
Но вот ӧтчыд дӧзмис верӧс,  
Юсай ытшкыны эз вудж.

Асьтö на пö сөйö мөскыд:  
Турун пуктöмысь и кув!  
Со тай, йөвсьыд на пö чөскыд,  
Кисьмö вотöс — чөд и пув.

Грыма-йирка гортас пырис,  
Көн оз курччась лөдз ни ном.  
...Но, а арнас мөсныс быри,  
Сэсся-й вөвлы воис пом.

Турун вайöмысь пö өвсим,  
Куйöд петкөдны оз ков,  
Тадзтö нинөм пö и вөвсьыс,—  
Шутөг гөтырыс эз ов.

Гозъя колины кор кыкөн,  
Ладсö кутан ори гез.  
Со нин ягысь ыджыд зыкөн  
Даддьөн кыскалöны пес.

Со нин тулыс югыд войөн  
Öдйөпырысь локтö бөр.  
Сөткигтырйи кокан шойөн  
Гозъя паръялöны йөр.

Со нин шондi синтö ёрö,  
Турун йылын лысва войт.  
Абу на пö ньöти зорöd —  
Öнi гозъяöс оз дойд.

Да и кадыс водзö синö,  
Со нин еджыдвидзö пуж.  
Вынтөм йөрö, гөртөминö,  
Нинөм гозъялөн эз чуж.

Тшак ва помсьыд — абу олөм,  
Но öд важас бөр он сын.

Пачтö ломтыны на колö:  
Пилитисны звöз и стын.

Кувны колис шуштöм позъяс  
Либö мунны кытчö гаж.  
Корны петöмабсь гозъя,  
Лымйыс кок уланыс — чаж.

Бур, мый мойдыс тайö важ.

### *Интернатын быдмис Коля*

Этша велöдчысьыс понда  
(Татшöм вайöдисны помка)  
Сиктысь бырöдисны школа.  
Интернатын быдмис Коля.  
Классысь классö сэні вуджис.  
Тайö-й вöлі сылөн уджыс.  
Сэсся кесйöдлöм эз тöдлы.  
Сейис — тырмис на кöть мöдлы.

Водзсö шогалис, дерт, ёна:  
Гортыд быдөнлы öд дона.  
Ни оз мыссы, ни оз гачась,  
Нинöм вылö оз мун ачыс  
Выльлун асыв лавка динö,  
Кытөн виччысьö машина.  
Но да велалан тай мортыд:  
Оз кут ковны мамыд-гортыд.

Öнi Коля ус нин быдтö,  
Тöдö сыланкывтö лыдтöм.

Бара гортас олө сійӧ,  
Пыді жырыын кадсӧ виӧ.  
Мамсӧ кесійӧдлӧ да видӧ,  
Пычкӧ шайт, а то и витӧс.  
Луннас узьӧ, рытнас юӧ:  
Ӧти во пӧ шойчча, шуӧ.

Кольӧ лун и вежон кольӧ,  
Гуга жель оз бергӧд Коля,  
Воча кывиӧн мамсӧ венӧ,  
Тэ пӧ эн на быдтыв менӧ.  
Татчӧ мамыс швачкас кинас,  
Сэссия вой шӧрӧдз оз инась,  
Шлюпкас-бӧрдас паччӧр дорас:  
Он ӧд йӧзӧ пет да норась.

\* \* \*

Абу ылын эськӧ ю —  
Гудыр сылӧн серыс.  
Нятшка-сӧя путассу —  
Кыськӧ вайӧм чери.

Абу ылын эськӧ вӧр —  
Чеган сэнӧ коктӧ.  
Вунӧді нин пӧтка кӧр —  
Корья-й сӧйлі, ог тӧд.

Абу ылын эськӧ ыб —  
Сю пыдди сэн турун.  
Некод нин оз чӧсмӧдлы  
Шаньгаӧн ни сурӧн.

Но өд вытыд оз тай чин,  
Медтө-й кадыс мунө.

Ыджыд лавка вылө син  
Кута лунысь лунө.

Овла код и дундөм — пөт,  
Вөтөн важас вола.

Сөмын овлө, мый ог төд,  
Гортын-ө ме ола.

### *Юсьөм трактористлы*

Велөдчөмтө огө кутöй дольны:

Мөд во кежлад öнi оз зэв кольны,

Кокныда жö трактористö воин.

И тшук медся колан мортөн лоин.

Лун сьомөснас петалан совхозö,

Рытнас пон кодь: чукөстасны оз-ö?

Кодлөнкө да оз на овсы могтөг,

Ен могысьөн бара кодкө локтө.

Бөра-водза ветлан, шуам, песла,

Сэсся кывтө вой шөрөдз көть песлан.

Оз ков корны, юкталöны: со пө.

Ыдждөдлөны, кызди важөн попөс,

Аски юрыд потө, сэтшөм шома,

Но өд могнад локтысьыд оз помась.

Лөсьыд жö нин вөссис тэныд олөм,

Вөтласны мый — абу весиг полөм.

Вөтлан көть, да кодөс пуктан мөдсө,

Карө туйыс кодыр абу пөдса.

И тэн помка ышнясьнытө чуктө,

Сорасьлан көть, пемдө али югдө,

Сэтчөдз вельмин, карта дорө көрым

Ваян сөмын вина пычкөм бөрын.  
Оз кө ньобны, абу тэныд шогыс,  
Көть мед сё мөс авзё сэні лёкысь.  
Вөйпөмыд тэн оз нин йидж ни инмы,  
Бырөд ва моз былялөма синмыд.  
Шудасны кыз, гөнтө он нин вежлы.  
А өд гөтыр-котыр на эм пезлөн:  
Витөнөсь көть гортад ныла-пиыс,  
Некод абу тыр сюсь витыс пиысь.  
Көть мед өтчыд воліс пыктөм юрад,  
Кодөс кыскан аслад урөс нюрад.  
Омөлыс мед ловнад тэнө босьтас,  
Нинөм тэысь енма-муа костас!

### *Талун батыё бара код*

Талун батыё бара код,  
Кок йылас оз сулав.  
Тадзтө абу-й паракод,  
Кызди ачыс шулас.

Жөдзө, быттьө синтөм гут,  
Тайкө джоджө сунас.  
Тадзтө некод оз и кут,  
Кытчө гаж мед мунас.

Кодкө мыжа сылы век,  
Эськө аслас мыжыс:  
Коскыс удж вылад оз чег,  
Пановтөма дышыс.

Эськө асывсяныыс мед  
Тыртчыны да юны.

Оз нӧ татчӧ лӧгыд пет,  
Веськыда кӧ шуны?

Сӧмын мамӧ... ме ог тӧд...  
Бытьӧ сыысь поӧ,  
Бытьӧ эз на лӧксыс пӧт,  
Сэтчӧ-татчӧ олӧ.

А ме ог нин сыысь пов,  
Ог ло сэсса лӧбӧн:  
Татшӧм батыд оз и ков,  
Бурджык — мед и абу!

### *Сиктса рай*

Кодкӧ карса волас,  
Гӧгӧр сылы лӧк.  
Ме вот сиктын ола,  
Ньӧти абу шог.

Поставка ни налог,  
Некод тэн оз вай.  
Сиктсаыдлы талун,  
Позьӧ шуны, рай.

Няньыд ньӧбны сюрӧ,  
Босьт кӧть кӧрыш дас.  
Муяс вылын турун,  
Видзьяс вылын рас.

Сьомыд уджсьыд шедө,  
Киад на оз төр.  
Лун шөр гөгөр петан,  
Рытьявылыс — бөр.

Йойыд өні гежөд,  
Коді видзө скөт.  
Өшинь улын вежөд  
Ытшкылөм оз төд.

Қарыд лои матын,  
Гортсьыд пет и — жур.  
Челядь — интернатын,  
Бара жө зэв бур.

Мудзтөдз сөран-изан,  
Вомыд — ваш да ваш.  
Чуткан телевизор,  
Қолө кө нин гаж.

Аски пөкмелитчан,  
Абу на кө пом.  
Мед сэн кодкө видчө,  
Чукөртө местком.

Видасны, дерт, бара,  
Петкөдласны теш:  
Оз өд кодкө карысь  
Лок да тэнө веж.

Өнія законыд  
Абу воддза кодь.  
Бригадир — и тонө  
Овлө садьтөм код.

Лыддысса совхозын,  
Морыс оз на лый.  
Но, а мый сэн водзын —  
Ме пайысь, коть мый.

### *Понъяс йылысь*

Понъяслы коть тода донсö,  
Дась ме лыйны мукöд понсö:  
Дыш да сямтöм, вомсö восьтас,  
Увтöмөн, а ассыс босьтас.

### *Төдтөм лэбач*

Төдтөм лэбач көнкө кылö,  
Вөр-пу йывсянь тивзö-ссылö.  
Мый нö, чатрасьны сэн мöдам?  
...Катша-ракаöс и тöдам.

### *Гусясысь*

Дасыд вылö вежыд петö,—  
Вот и кыскö кысь мый шедö.  
Сöмын водзсö кыскис киас.  
Öнi пунктö «Жигулиас».

## *Он кӧть этша*

Он кӧть этша босьтлы сьӧмтӧ,  
Он на ньӧб тай пасьтӧ-кӧмтӧ.  
Ӧні мӧдарӧджык овлӧ:  
Кодкӧ корсьӧ, кодкӧ новлӧ.

## *Эг и дугдӧй*

Енмӧс пыдди ог кӧть пунктӧй,  
Кевмысьӧмысь эг и дугдӧй:  
Мудзлас вомыд, усьлӧ кныд —  
Сы дон сувтӧ ӧтка пыд.

## Съывтөг олөм — абу олөм

(Частушкаяс)

Съывтөг олөм — абу олөм,  
Рытыс сідзитө оз коль.  
Сылан асьтө, сылан йөзсө,  
Сөмын абусө он доль.

Бура лысьтыся совхозын,  
Босьта весиг содтөд дон.  
Бара көсйысьöны кукань,  
А мен колө төлка зон.

Ньöби карысь мича тупли,  
Ветлі клубö — ме и эм!  
Локны куті зэрөм бöрын,  
Няйтө коли — öнi сэн.

КБО-ö вурсян нуи:  
Мися, быри öти шог.  
Сэтшөм пальто вурөмаөсь,  
Öнi бара ун оз лок.

Сямтөм жö нин мукөд мортыс  
Шуны колө сизимысь.  
Он төд, мый сылы оз тырмы,  
Витаминнöй, гашкө, пызь.

Муяс сайтi сиктссянь карөдз  
Вольсалісны зумыд туй.  
Öнi лунөн сэтчө петан,  
Сөмын кыссы либö уй.

Мукӧд бабаыс да мӧскыс  
Ӧткодь, видзӧдан да, шань:  
Кага абу, кукань абу —  
Ӧтчыд вайлім пӧ и шань.

Збыльысь, чайта, енмыд абу,  
Эськӧ петкӧдліс нин гаж:  
Мый нин вичкоын эз вӧвлы,  
Ӧні сэтӧні гараж.

Сейысь керка аслым вӧчи,  
Ог тӧд, нильзяс али оз.  
Эз коль ягыс матігӧгӧр,  
Ставсӧ куштіс леспромхоз.

Вот и помӧдз воис сьылӧм,  
Мыйта тырмис миян сям.  
Кодлы этша, медым содтӧ,  
А ми водзӧс кывзыштам.

## *Руч да мой*

*Басня*

Комиӧдӧма С. Михалковлысь

Руч казяліс ай мойӧс  
Да дыркодь синнас сейис:  
И зіль да кужысь,  
И пасыс дона,  
Ни абу сэтшӧм пӧрысь со на...

Дзик лыда колис вой,  
А ручлы бөрдмөн кутіс қовны мой.  
Оз өшйи инас: «Мукөд ручсыс  
Ме мыйөн лёкджык? Кыт оз судзсыс?  
Мен окота жө овны позйөн,  
Ас мойкөд гөзийөн!»

И со нин ручиль бөжнас өвтө  
Да мелі кывъяс помся чөвтө,  
Сідз асладорые синө,  
Мый мойлы-й шуны-с нинөм.  
Эз төдлы мой, кызд лигышмуніс,  
А гортас кольөм энъыс ыштө вуніс:

И пөрысь нин,  
И йөйоват да гысы,—  
Көть мынөма нин сысы!

Но колис кад, и коркө мойлы  
Ёж паньд уси. Бокас тойлө:

«Но, кызд нин олан? Зэв тай мыйкө  
жугыль?»

«Да, кутшөм олөм — ставыс дзугыль!  
Өд төдан ручтө, вой-вой көнкө ветлө,  
То ва дорысь, то сиктысь — кысь мый  
шедлө!»

Мед сөмын вөччыны да йөзын сөйны-юны!  
Ме локта мудз, а сійө — тювк — и мунө!  
И кыв оз сетлы, вошласьөсө көні.  
И вөлі гөрд, а чим съөд өні.

Кызд зверлы зверь, ме тэныд веськыда  
тан шуа:

Көть вөйтча татчө юас!  
Но помөдз висьтасы нин, ёртө:  
Эм дум вот... бергөдчыны гортө.  
Оз, гашкө, энъөй нырө зурөд:  
Зэв сьөлөм вылас сійө бур өд!»  
«И котөрт,— ёж сэк вочавидзис,—  
А то и збыльсы эштан сідзик!»

Мой нюжмасьны эз кут, дай туйыс вöлі  
тöдса,  
Но видлы — пыр, горт öдзöсыд кор пöдса.  
И, коньöр, игöдчö да ен могысьöн  
лэдзны корö.  
А гöтырыслöн öти воча кыв: «Мун  
ручыд дорö!»  
Мый вöчан! Лётіктіс бөр ручлöн позйö,  
А руч нин мöдкöд олö гозйöн.  
Дерт, басня помсыд ручыд лоас кö  
на бурöн,  
Но мед кöть пöрысь мойыс оліс эськö  
юрöн!

## Юриндалысь

### 1

«Октябрлөн яр биысь...» . . . . .	5
Ертасьом . . . . .	5
Ленин йылысь . . . . .	6
«Эз на важён...» . . . . .	6
Асшөр олөм . . . . .	7
«Оз сөмын вужсянь...» . . . . .	7
«Войвыв ывла менö...» . . . . .	8
Ас сьылан . . . . .	9
Совхозса директор . . . . .	9
Морт нэм . . . . .	11
Тодса коми пөрөдчысьлы . . . . .	12
Гортын . . . . .	13
«Эм на пельöс...» . . . . .	14
«Быд мулөн аслыспөлöс мич...» . . . . .	15
«Быдтор йылысь позьö гижны...» . . . . .	16
Куратовлы . . . . .	16
Илля Васьлөн кувсьом кузя . . . . .	17
Отчыдысь волö . . . . .	18
Чужан да быдман . . . . .	19
«Коркö долыд...» . . . . .	20
Элясьом . . . . .	21
Кылдза рас . . . . .	22
Сирьюдін . . . . .	23
«Коркö скөрмөмла...» . . . . .	24
Машö тьöt . . . . .	25
«Коркö зильөн шулім...» . . . . .	26

«Медтöй гöна лёлö...» . . . . .	26
«Оз нин сэтшöм уна...» . . . . .	27
«Кокныда овны...» . . . . .	27
«Кутшöм эм, а гöтыр эм...» . . . . .	28
Ошйысьöм . . . . .	29
«Ог нин ризъяв...» . . . . .	30
Менам геройяс . . . . .	31
Бурасьöм . . . . .	32
Пöчö . . . . .	33
«Кор ёртöс гуалим...» . . . . .	34
Кытчö лэбö вертолёт? . . . . .	35
Юан висьöм . . . . .	36
Ме война вылö муні кор . . . . .	36
Кымын герой мян . . . . .	37
Ми туйынöсь . . . . .	39
Ов, республика, да нимав . . . . .	39

## II

Кöка вояса му . . . . .	43
Коми муöй . . . . .	43
Муста-Тунтури . . . . .	45
Шондйöй-мамöй . . . . .	46
Он тай, вöлöм . . . . .	46
Гажа эськö ю сайыс . . . . .	47
Визувтö Эжва . . . . .	48
Чужан му тöдöны юсьяс . . . . .	49
Лэчча ва дорö тулыснас . . . . .	50
Лымъялö ли зэрласьö . . . . .	51
Вой шөр войö . . . . .	52
Кыддза-козъя . . . . .	52
«Югыд вöлі сйö войыс...» . . . . .	53
«Бара гудок кылö татысь...» . . . . .	54
Öдйö пуксьö асылыс . . . . .	54
Кокöй менам, кокöй . . . . .	56

### III

«Чушканзілы», нимлун кежлас . . . . .	59
Тодса Васса . . . . .	59
Дачаяс йылысь . . . . .	61
Важ мойд . . . . .	63
Интернатын быдмис Коля . . . . .	65
«Абу ылын эськө ю...» . . . . .	66
Юсьом трактористлы . . . . .	67
Талун баты̄ бара код . . . . .	68
Сиктса рай . . . . .	69
Поньяс йылысь . . . . .	71
Тодтөм лэбач . . . . .	71
Гусясысь . . . . .	71
Он коть этша . . . . .	72
Эг и дугдöй . . . . .	72
Сывтөг олөм — абу олөм . . . . .	73
Руч да мой . . . . .	74

*Геннадий Анатольевич Юшков*

**ПЕРЕД ДОБРЫМИ ЛЮДЬМИ**


*Стихотворения на коми языке*

*Художник В. В. Токарев.*

Редактор *А. В. Некрасов.* Художественный редактор *В. Б. Осипов.* Технический редактор *А. Н. Вишнева,* Корректор *Э. С. Греггер.*

Сдано в набор 10.11.83 г. Подписано к печати 01.02.84. Ц01028. Формат 70×90<sup>1</sup>/<sub>32</sub>. Бумага № 1. Гарнитура «Литературная». Печать высокая. Усл. печ. л. 2,92; усл. кр.-отт. 3,1; уч.-изд. л. 2,66. Тираж 2000. Заказ № 8297. Цена 25 коп. Коми книжное издательство. 167610. Сыктывкар, ул. К. Маркса, 229.

Республиканская типография Государственного комитета Коми АССР по делам издательств, полиграфии и книжной торговли. 167610, г. Сыктывкар, ул. Первомайская



25 кӧп.

*Коми  
книжной  
издательство  
1984*